

Despues di a traha 37 aña den Corte di Justicia

JUEZ ERNEST MOHAMED TA BAY CU PENSIOEN

ORANJESTAD (AAN): Juez mr. Mohamed, un persona conoci den comunidad pa su forma unico di trata caso den Corte, pronto lo baha cu pensioen despues di a traha gran parti di su bida cu justicia.

Den su sentencianan por a nota cu e tin un forma especial di analisa casonan.

Mr. Mohamed ta e unico Juez cu durante tratamiento di casonan ta expresa su preocupacion pa cu e criminalidad den hubentud na Aruba.

Hopi biaha e ta scual na solamente e mucha, kende na e momento ey ta para su dilanti como un acusado, pero tambe ta scual e mayornan mostrando nan ariba nan responsabilidad.

TRAHA 10 AÑA NA SHELL CURAÇAO

DIARIO den un entrevista exclusivo cu mr. Mohamed a constata cu mr. Mohamed promer cu el a traha na Corte di Justicia, el a traha na Shell na Curaçao.

Desde 12 di Februari 1945, mr. Mohamed ta trahando. El a cuminsa traha na Shell, caminda el a traha pa 10 aña largo.

Mientras cu e tabata traha na Shell den dia, den horanan di anochi e tabata studia. Esaki a pone cu dia 27 di Mei 1953 el a gradua y a haya su "advocaten diploma".

Dia 16 di Juli 1957 el a cuminsa traha na Departament ban Justitie na Curaçao. Como cu e porvenir di e departamentu tabata inseguro, el a worde ofreci pa bin traha na Griffie na Aruba pa asina worde educa como un "substituut Griffier" pa Corte den Promer Instancia na Aruba.

E tempo ey tabatin vacatura pa e puesto aki ya cu señor Bouwman a bay cu pensioen.

NA 1958 MR. MOHAMED TA BIN ARUBA

Dia 16 di April 1958, mr. Mohamed a yega Aruba y despues di a sigui su curso dia 1 di Januari 1961 el a worde nombra como "substituut Griffier" di Corte den Promer Instancia.

Algun luna despues, 17 di April 1961, mr. Mohamed a worde encarga cu e funcion di suplencia di Griffier di Corte Superior.

Debi na e hecho cu e Griffier a sufri kebrante di salud

na Hulanda y a fayece, mr. Mohamed mester a keda ocupa e puesto di Griffier suplente di Corte Superior y dia 1 di Januari 1963 el a worde nombra pa esaki.

Na Augustus 1964, mr. Mohamed a bay Hulanda caminda el a termina universidad y a optene e titulo di "meester in de rechten" y pesey promer cu su nomber ta pone "mr.".

MR. MOHAMED NOMBRA COMO JUEZ

Despues di a termina su estudio na Hulanda, mr. Mohamed a regresa Aruba y dia 27 di Juli 1983 el a worde nombra como Juez suplente di Corte di Justicia.

Mr. Mohamed a splica cu antes, tempo cu e tabata Griffier, pueblo tabata haci hopi uso di servicio di Griffier ya cu no tabatin hopi abogado manera awor ta e caso.

Ta asina cu na 1958 Aruba tabatin 6 abogado so y awor na 1993 Aruba tin nada mas y nada menos cu 36 abogado.

Antes en total tabata papia di mas o menos 600 caso cu tabata worde trata den un aña y awor e cantidad di casonan ta den careda di 2500 pa aña.

Mr. Mohamed a splica cu na añanan 80 tabata tin momento cu e cantidad di casonan a aumenta asina hopi cu nan a pasa 3 Mil. E tempo ey a introduci un sistema cu mester paga un suma ora bo kier cuminsa un caso. Esaki a pone cu hopi di e casonan chikito no tabata worde entama mas.


E PROMER BIBLIOTECA

Pa loke ta trata e edificio di Corte di Justicia, mr. Mohamed a indica cu e edificio tabata mucho mas chikito cu loke nos por mira awe.

Antes e edificio tabata consisti di un cantidad di departamentu den otro.

E departamentu Griffie tabata ocupa dos oficina, mientras cu tabatin dos oficina dilanti esakinan pa e dos Jueznan cu e tempo ey tabata na Aruba.

A cuminsa expande e edificio y den e espacio caminda awor e sala di Corte abao ta situa, tabata antes Voogdijraad. Caminda awor e oficina di "strafzaken" ta situa, tabata antes Reclasering y un otro bloque tabata Sociale Zaken.



Loke ta e parti di e edificio unda parket ta, e tempo ey no tabata existi.

Segun cu e casonan tabata aumenta no solamente den cantidad pero tambe den calidad, mester a sigui crea mas espacio.

A construi un parti nobo, unda awe parket ta estableci y e tempo ey Sociale Zaken a muda pa eynan, e otro departamentonan esta Voogdijraad y Reclasering a muda pa e otro espacionan cu a bira bashi mientras cu e espacio caminda awor tin e sala di Corte abao, a worde converti den un biblioteca y asina pa promer biaha Jueznan tabata conta cu un biblioteca apart.

EDIFICIO DI CORTE DI JUSTICIA A WORDE RENOVA

Mr. Mohamed a sigui conta cu no a dura mucho cu a construi un sala ariba. Esaki ta e sali caminda actualmente Juez Comisario ta interroga e presonan.

Debi cu no tabatin espacio adecua, mester a muda e oficina di deurwaarderman, cu tabata den un espacio chikito banda di e sala abao, pa un otro edificio cu tabata situa banda unda awe e radio emisor Galactica ta situa.

Na 1987, edificio di Corte di Justicia a conoce un renova-

cion completo caminda tur e departamentonan di Corte di Justicia a muda pa e parti ariba di Postkantoor na Playa.

ANTES ARUBA TABATA CONTA CU 2 JUEZ

Despues di e renovacion, parket cu tabata situa dilanti den e edificio di Corte a muda pa e edificio patras unda Sociale Zaken tabata situa.

E espacio cu parket tabata ocupa a worde converti den oficinan pa tur e Jueznan. Antes Aruba tabata conta cu 2 Juez pero actualmente tin 6 Juez ta tratando caso.

Pa loke ta trata e personal di Griffie, mr. Mohamed a indica cu tempo cu el a bin Aruba, e tabata conta cu 9 personal pero actualmente e departamentu a expande asina hopi cu en total tin 29 persona ta trahando.

Mr. Mohamed a muestra cu un di e casonan mas grandi e tempo aya tabata esun di construcion di e container haven.

El a splica cu un caso asina por dura añas ya cu e testigonan tabata na Hulanda. Pa evita esaki, tur e Jueznan a reuni y a dicidi cu mr. van der Griendt lo keda encarga cu e caso.

Mr. van der Griendt a viaha pa Hulanda y den dos siman

el a logra interroga tur e testigonan.

Pa loke ta trata su experiencia durante e 37 añanan den Corte di Justicia mr. Mohamed a bisa cu e tin asina hopi experiencia cu e por traha un buki completo.

Loke e por bisa en corto ta cu su experiencia tabata grato y cu e harmonia na trabao tabata asina bon cu tur mainta e ta lanta cu e mesun gana pa traha. El a indica cu como Griffier el a percura pa e relacion entre e trahadornan tabata algo unico.

Dia 20 di Januari mr. Mohamed lo cumpli 68 aña y e mesun dia aki e lo bay cu pensioen, despues di a sirbi 37 aña di su bida den justicia.

DIARIO ta kere cu merecidamente mr. Mohamed mester bay cu pensioen pa asina sosiega despues di e tantisimo trabao cu el a haci durante 37 aña largo.

Dialuna awor den horanan di atardi Corte Comun di Justicia lo tuma despedida di Juez mr. Mohamed y alavez lo instala e Juez nobo cu lo reemplaze.

DIARIO ta kere cu mr. Mohamed a contribui grandemente cu e pais y pesey tambe mr. Mohamed tabata un di esnan cu a ricibi un plaquette di DIARIO como aprecio pa tur e trabaoan importante cu el a haci.

TELEFONNAN DI DIARIO
22207-26747-35023